

## Gotzon Garateri jarriak

### I

Gotzon zenaren omenez,  
borondaterik onenez,  
esaera nahiz izaerari  
bera emanaz...  
Etorri ahala joanez  
beti praka-bete lanez:  
“Ardi galdua atxeman leike;  
Aldi galdua ez”.



MADDI SOKOA

### IV

Behorrek maite moxala  
irudi unibertsala.  
Jabetu zaitetz zu joatean  
gelditu gerala  
“behiaren bosgarren txahala”  
baldin bagina bezala.  
Poz bat badugu zure iturritik  
non edan badala.

### II

Filologia eskola  
baten beharra zegola;  
hasi bazinen zuk ez zenuen  
etsiko inola.  
Jo hemen eta jo hola,  
orain bai argi dagola!  
“Epaitza ematen zaion aldera  
jausten da arbola”.

### V

“Inoren zer esangoak  
lotzen dizkigu zangoak”.  
Korapiloak askatzen daki  
berezko magoak.  
Esaera zahar lehengoak,  
hango, horko, hemengoak...  
muga guztiak gainditzen ditu  
zenbaiten gogoak.

### III

Euskarak duen tamaina  
bedi arrotzeko aina.  
Horretarako legea alde  
behar da estraina.  
Frantzia eta España,  
utik biak alajaina!  
“xinaurrientzat ihintza uholde”  
gertatzen da baina.

### VI

“Apaizaren lapikoa...”  
“Mahaikoa ez da nahikoa”  
“Ikusi eta ikasi”aren  
barne-zimikoa...  
New York hiri handikoa,  
Xiberun baserrikoa...  
Gotzon, mundu bat sortu zenigun  
geure neurrikoa.

**DOINUA:** “Aizak hi mutil mainontzi”.